

ЎЗБЕКИСТОН ПРЕЗИДЕНТИНИНГ ҚИРҒИЗИСТОНГА ДАВЛАТ ТАШРИФИ БОШЛАНДИ

Ўзбекистон Республикаси Президенти Шавкат Мирзиёев рафиқаси билан бирга давлат ташрифи билан Бишкек шаҳрига келди.



Икки мамлакатнинг давлат байроқлари билан безатилган “Манас” халқаро аэропортида олий мартабали меҳмонлари Қирғиз Республикаси Президенти Садир Жапаров ва унинг рафиқаси кутиб олди.

Бу ерда давлат раҳбарларига Ўзбекистон ва Қирғизистон халқлари ўртасидаги дўстликни тараннум этувчи муסיқий-фольклор чиқишлар намойиш этилди.

Сўнг Президентимиз Қирғизистон Бош вазири Акилбек Жапаров ҳамроҳлигида “Ата-Бейит” миллий тарихий-ёдгорлик мажмуасига ташриф буюрди.

Давлатимиз раҳбари 1916 йилги фожиали воқеаларнинг қурбонлари хотирасига бағишланган “Уркун” ёдгорлиги пойига гулчамбар қўйди.

Мажмуа 2000 йилда қирғиз давлатчилигининг энг муҳим босқичлари ҳақидаги тарихий хотирани тиклаш ва асраб-авайлаш мақсадида ташкил этилган. Қирғиз халқининг улуғ ёзувчиси Чингиз Айтматов таклифи билан ёдгорликка “Ата-Бейит” — “Оталар қабри” деган ном берилган.

Ўзбекистон Республикаси Президентининг Қирғизистонга давлат ташрифи давом этмоқда.

Ў.А.

Ўзбекистон Республикаси Президенти Матбуот хизмати сурати.

Долзарб мавзу

МИЛЛИЙ МАНФААТЛАРИМИЗГА МОС

Ҳозирги кунда дунёда кечаётган сиёсий зиддиятлар, санкцияларни қўллаш, Россия энергия ресурслари харидини чеклаш энергия инқирозининг юзага келишига ва нархларнинг кескин тебранишига сабаб бўлди ҳамда бундай ҳолатлар оқибатларини бартараф этиш масаласини кун тартибига олиб чиқди.

Юзага келган вазият ушбу жараёнлар бошлангунга қадар Европа Иттифоқи бозорларига йилга 200 миллиард кубометрдан ортиқ газ ёқилгиси етказиб берган Россиянинг “Газпром” компанияси учун жиддий муаммоларни келтириб чиқаргани ҳеч кимга сир эмас. Чунки газ қазиб олиш, узатиб бериш ҳамда қайта ишлаш узлук-

сиз жараён бўлиб, бутун бошли ишлаб чиқариш мажмуасини ташкил қилади ва қазиб олинаётган газни “мурватни бураб” тўхтатиб туриб бўлмайди. Айнан шу омил газ ишлаб чиқариш ва етказиб бериш логистикасини Фарбдан Шарққа қараб буриш заруратини келтириб чиқарди, десак, хато бўлмайди.



ЭНЕРГЕТИКА ТИЗИМИДАГИ ЭҒАЛИК ЎЗ ҚЎЛИМИЗДА ҚОЛАДИ

Бугун Ўзбекистонда иқтисодиёт тармоқлари ривожланиш босқичини бошдан кечирмоқда. Автомобилсозлик, кимё, фармацевтика, электротехника, тўқимачилик, энгил саноат, қурилиш ҳамда қишлоқ хўжалиги соҳаларида сезиларли даражада ўсиш кузатилаётир. Урбанизация, яъни жамият ҳаётида шаҳарларнинг роли ортиб, аҳолининг ижтимоий, демографик таркиби, турмуш тарзи ва маданиятида катта ўзгаришлар жараёни кечаётгани ҳам айна ҳақиқат. Бу, ўз навбатида, энергия ресурслари — нефть-газ ва электрга бўлган талабнинг ортишига олиб келиши табиий.

Ҳозирги ислохотлар жараёнида ушбу муҳим ва энг долзарб масала қай таразда ҳал этиляпти? Юртимизда иқтисодиётнинг барқарор ўсишини таъминлаш ва аҳоли фаровонлигини оширишга, ёқилғи-энергетика ресурсларига бўлган талаб-эҳтиёжни узлуксиз қаноатлантиришга қаратилган нефть-газ, энергетика, кўмир, кимё, қурилиш индус-

триясини ривожлантиришга йўналтирилган узоқ муддатли стратегия амалга оширилмоқда. Бунда мажҳуд ис-сиклик, гидроэлектр станциялари модернизация қилиниши, янгиларини ишга тушириш билан бирга, мубоқбил энергетикани ривожлантиришга қаратилган йирик инвестициявий лойиҳалар ҳаётга татбиқ этиляпти.



«КАТТА ИМКОНияТЛАР ТАШРИФИ»

ЎЗБЕКИСТОН ПРЕЗИДЕНТИ ШАВКАТ МИРЗИЁЕВНИНГ ҚИРҒИЗИСТОНГА БОШЛАНГАН ДАВЛАТ ТАШРИФИГА ЕТАКЧИ ҚИРҒИЗ ОММАВИЙ АХБОРОТ ВОСИТАЛАРИ АНА ШУНДАЙ ТАЪРИФИ БАРАЁТИР.

Қирғизистоннинг “Кут билим” нашри ва оммабоп “Вечерний Бишкек” нашриёт уйи веб-саҳифасида эълон қилинган сиёсатшунос Кубан Абдимен қаламига мансуб “Ўзбекистон имижини ўзгартирган Президент” сарлавҳали мақолада ушбу ташрифнинг аҳамиятини бошқача баҳолаш ғайриимкон эканлиги таъкидланган.

Акс садо

“Биринчидан, мазкур ташриф Шавкат Мирзиёев 2021 йил октябрь ойида Ўзбекистон Президенти этиб қайта сайланганидан кейин Қирғизистонга биринчи ташрифидир. Иккинчидан, ўттиз йиллик музокаралардан сўнг жорий йил Ўзбекистон ва Қирғизистон давлат чегарасидаги барча баҳсли участкалар бўйича келишув жараёни якунланди. Учинчидан, Ўзбекистон Хитой — Қирғизистон — Ўзбекистон темир йўли қурилиши бўйича халқаро лойиҳада иштирок этишини расман эълон қилди. Тўртинчидан, Тошкент Қозоғистон билан биргаликда Қирғизистонда “Қамбарота ГЭС-1” қурилиши бўйича йирик лойиҳада қатнашишга қарор қилди. Ушбу лойиҳанинг амалга оширилиши оқимнинг қўйи қисмида жой-

лашган мамлакатларга вегетация даврида кафолатланган сув ресурсларини етказиб бериш, шунингдек, йил мавсумидан қатъи назар, минтақа ягона энергетика тизими учун электр энергияси ишлаб чиқаришни таъминлаш мақсадларига қаратилган”, деб қайд этган муаллиф.

Қирғиз сиёсатшуноси Президент Шавкат Мирзиёев томонидан бевосита қабул қилинган қарорлар асосида Қирғизистон ва Ўзбекистон муносабатларида эришилган бошқа кўплаб ижобий ўзгаришлар борлиги ҳақида ёзган. “Ўзбекистон раҳбарининг қирғиз халқи ва бутун Қирғизистонга нисбатан самимий муносабати яхши маълум, — деб урғулаган Кубан Абдимен. — Ўзбекистон етакчиси Жиззах вилоятидаги қирғиз миллатига мансуб аҳоли истикомат қиладиган Манас қишлоғи қиёфасини

янгилаш ташаббусини илгари сурган ва қирқ беш кун ичида ушбу қишлоқ буткул янги замонавий қиёфага эга бўлганини кўриб, хурсанд бўлган эди. Бу унинг қирғиз халқига бўлган ҳурмати, “Манас” достонининг мазмун-моҳиятини чуқур англагани, шунингдек, Ўзбекистондаги қирғиз диаспорасига ҳурмат-эҳтиромидан ёрқин далолатдир”.

“Қабар” Миллий ахборот агентлиги “Катта имкониятлар ташрифи. Қирғизистон ва Ўзбекистон Президентлари мислсиз ҳужжатлар тўпламини имзолайдилар” сарлавҳали мақолани тарқатди. Унинг муаллифи Кирилл Степанюкнинг ёзишича, “Қирғизистон ва Ўзбекистон ўртасидаги муносабатлар мисли қўрилмаган юқори даражага кўтарилмоқда. Икки давлат етакчилари чегарани белгилаш бўйича баҳсли масалаларни ҳал этиб бўлган иқтисодий кун тартибидини илгари суриш билан фаол шуғулландилар. Президентлар Садир Жапаров ва Шавкат Мирзиёев асосий эътиборни ҳар икки республика аҳолиси фаровонлигини оширишга хизмат қиладиган кўп томонлама ҳамкорликни ривожлантиришга қаратмоқда”.



МЕРИТОКРАТИЯ, ПРАГМАТИЗМ ВА ҲАЛОЛЛИК — СИНГАПУР ЮТУҚЛАРИ АСОСИ

Таҳлил

Миллий тараққиёт, жаҳон ичра тенг бўлиш ва дунёга чиқиш ҳеч қачон силлиқ кечмаган. Халқаро ҳамжамиятдан ўрин олиш учун амалий ҳаракатлар, яқдиллик, муштарак мақсадлар, юксак тафаккур, билим ва таълим зарур.

Таълим жамиятга шахсни, кадрларни шакллантириб беради. Шахс эса давлат олиб бораётган ислохотлардан хабардор, ҳамқадам ва фаол бўлиши лозим. Шуни англаш керакки, фуқаронинг дунёқараши жамият ва мамлакатда кечаётган жараёнлардан орқада қоладиган бўлса, давлат ҳокимияти томонидан қабул қилинган қонунлар ишламайди, ҳар қандай назорат ҳам қўтилган натижани бермайди. Қачонки, дунёқараш ва интилиш амалдаги давлат ҳокимияти фаолиятдан олдинда бўлсагина, миллат ва мамлакат ривожланади. Акс ҳолда тараққиёт эмас, битта жойда депсиниш, тургунлик содир бўлаверади.



Ўзбекистон Республикаси Президентининг Қ А Р О Р И

БУЮК ШОИР ВА ОЛИМ, МАШҲУР ДАВЛАТ АРБОБИ ЗАҲИРИДДИН МУҲАММАД БОБУР ТАВАЛЛУДИНИНГ 540 ЙИЛЛИГИНИ КЕНГ НИШОНЛАШ ТЎҒРИСИДА

Жаҳон тарихида ўчмас из қолдирган бетакрор сиймолардан бири Заҳириддин Муҳаммад Бобур буюк шoir, қомусий олим, давлат арбоби ва моҳир саркарда сифатида бутун дунёда маълум ва машҳурдир. Унинг беқиёс илмий-ижодий мероси нафақат миллий маданиятимиз ва халқимиз адабий-эстетик тафаккурининг шаклланишида, балки жаҳон адабиёти, илм-фани ва давлатчилиги тарихида алоҳида ўринга эга.

Мустақиллик даврида Заҳириддин Муҳаммад Бобурнинг ҳаёти ва фаолиятини ҳар томонлама чуқур ўрганиш, унинг асарларини юртимиз ва хорижий давлатларда тарғиб қилиш борасида кенг кўламли ишлар амалга оширилди. Хусусан, шoir туғилган кун — 14 февраль санаси ҳар йили мамлакатимиз бўйлаб адабиёт ва илм-маърифат байрами сифатида нишонланмоқда. Бобуршунослик соҳасида кўплаб тадқиқотлар, республика ва халқаро миқёсда илмий анжуманлар мунтазам ўтказилмоқда.

Кейинги йилларда Тошкент ва Андижон шаҳарларида Бобур Мирзонинг муаззам ҳайкаллари ўрнатилгани, унинг туғилиб ўсган юрти — Андижон шаҳрида Бобур номидаги халқаро жамоат фонди ва унинг тасарруфидаги “Бобур ва жаҳон маданияти” китоб музейи фаолият қўрсатаётгани, “Бобур энциклопедияси”, “Бобур куллийети”, “Бобур. Бабуриды. Библиография” деб номланган салмоқли асарларнинг нашрдан чиқарилгани, “Бобур ва дунё” журналининг ташкил қилингани маданий ҳаётимизда катта воқеа сифатида эътироф этилди.

Жонажон Ватанимиз миллий ривожланишининг янги босқичига — Учинчи Ренессанс даврига қадам қўяётган, ҳаётимизнинг барча жабҳаларида тўб ўзгаришлар юз бераётган бугунги кунда Бобур Мирзонинг бебаҳо меросини чуқур ўрганиш ва оммалаштириш янада муҳим аҳамият касб этмоқда.

Буюк аждодимиз асарларининг миллий ва умуминсоний моҳиятини, унинг ёш авлодимиз интеллектуал ва маънавий салохиятини ошириш, фарзандларимизни шу асосда Янги Ўзбекистон бунёдкорлари этиб тарбиялаш борасидаги улкан ўрни ва таъсирини инобатга олиб, Бобур Мирзонинг илмий ва ижодий меросини мамлакатимиз ва халқаро миқёсда янада чуқур ўрганиш ва тарғиб этиш мақсадида:

1. Маданият ва туризм вазирлиги, Олий таълим, фан ва инновациялар вазирлиги, Фанлар академияси, Ёзувчилар уюшмаси, Республика Маънавият ва маърифат маркази, Бобур номидаги халқаро жамоат фонди ҳамда жамоатчилик вакилларининг 2023 йилда Заҳириддин Муҳаммад Бобур таваллудининг 540 йиллигини кенг нишонлаш тўғрисидаги таклифи маъқуллансин.

2. Заҳириддин Муҳаммад Бобур таваллудининг 540 йиллигини нишонлаш бўйича ташкилий қўмита (кейинги ўринларда — Ташкилий қўмита) тузилсин ва унинг таркиби иловага мувофиқ тасдиқлансин.

(Давоми 2-бетда).



Мулоқот

ЎЗБЕКИСТОН ТАШАББУСЛАРИНИНГ ХАЛҚАРО ЭЪТИРОФИ

Олий Мажлис Қонунчилик палатаси Спикерининг биринчи ўринбосари Акмал Саидов БМТнинг Ўзбекистондаги доимий координатори вазифасини бажарувчи Рита Консуэло Фатима Видал Брюсни қабул қилди.

Мулоқот чоғида А. Саидов Консуэло Видал Брюсни шарафли ва масъулиятли лавозимга тайинлангани билан қутлар экан, меҳмонга Қонунчилик палатасининг тарихий тузилиши, қонун ижодкорлиги йўналишидаги фаолияти, қўми-

талар, комиссиялар ва депутатларнинг асосий вазифалари, 2022 — 2026 йилларга мўлжалланган Янги Ўзбекистоннинг тараққёт стратегияси доирасида амалга ошири-лаётган ишлар ҳақида сўзлаб берди.



